



Dô la sconfitta dla partita de dezijiun cuntra le Montan da in sabeda, é i sogadûs da La Val jûs a Freienfeld a porvè de arjunj le terzo post cuntra la squadra da Ritten, bel incuntada te Copa Provincia in chësc ann. A La Val ne ti gareta nianca le secunda “chance”, le Ritten é bugn de ti fa n gol ti pröms menüć y de defënn bun le resultat fina ala fin.

Ince sce la terna arbitrala à sciuré le imposcibel cuntra la squadra ladina, ne à i sogadûs bria de se trà dant nia, al é gnü porvè cina ala fin de stiché l' avversar.

La partida mêt man sot na plöia lisîra y atira é le Ritten co mêt i sogadûs ladins sot a druch. Al vëgn conzedü massa y i atacanc é bugn de trà fora n gröm de fai al limit dl'area. Bele do 10 menüc ti gareta le gol a l'atacant sterch da Ritten, pericul numer un por la defenjiun da La Val. Chësc ciafa n bel pasaje al limit dl'area y cun n bel control él bun de se rodè y de trà sön le palo lunch de porta, la strata de Luki ne ti permët nia de abiné le pal. 1 a 0 por le Ritten. Dô le gol é spo ince la squadra de Floriani che se lascia bel plan udëi, al vëgn indô costruì aziuns cun de beles combinaziun danter mezcîamp y atach. Le ultimo pasaje vëgn scialdi sciuré demez y atira é indô les ripartenze di avversars dassënn prigoroses. Le arbiter fej ince gnì dūc nervöj te ciamp, cinamai é n sogadù avversar che ti dà arjunj ai sogadûs ladins por val protesta. Dan le prom tēmp é ciamò Romeo che à na bela ocasiun. Sön n cros de Alex E. rōia le pal amesa la defenjiun fora sön le pé a Romeo, por desfortüna ne él nia bun de abiné la porta y tira le pal sura fora.

Dô chësc episode sciüra le arbiter la fin dl prom tēmp sön le resultat de 1 a 0 por le Ritten.

Tl secundo tēmp rōia i sogadûs cun plö convinziun te ciamp, l'alenedù alza la squadra y passa indô, sciöche la sabeda, a n modulo plö offensiv por jì a chirì la parité. Tla pröma pêrt ne suzedl

nia gran tröp, le mezciamp da La Val se stënta ince a mët jö le pal y al partì fora sön les fascas. Le arbiter pegiorëia ciamò deplö la situaziun y fej por ejèmpl prosegüi le jüch cun sogadûs ia por tera y conzed puniziuns inejistëntes. Le alenadù Floriani vëgn ince desgört dal ciamp por protesta.

Le Ritten fala ince de püch l'ocajiun de radopié le resultat, l'atacant röia sù dan porta, la trata vëgn deviada da Luki y cogura bel plan te porta, Elmar V. é ciamò bun "in extremis" de tignì sò le pal sön la riga. I sogadûs da La Val é plö tendënc y a sughé le pal âlt tla secunda pêrt, cîs cun i rinvi de Luki, che ciara de scavalchè la defenjiun por l'inserimënt de n atacant. La Val à ince ciamò val ocajiuns dan porta mo sënza ester prigorûsc. Dan le sciüra dla fin é ciamò Romeo che ciafa n bel pal âlt da Dorigo sön le pé amesa area. Al ne pënza nia sura dui iadi y tira na trata al jôre, che vëgn naôta deviada dal defensur y spo é ciamò le portier bun dl tignì sò cun i dëic sön la riga.

Nia da nen fa plü, le arbiter sciüra la fin y la squadra da La Val pêrd definitivamënter la ferata por ruvé te secunda. Le trù é stè lunch y impegnativ, mo les bries ne à ala fin nia portè a la promoziun. De gran complimënc ti vâ impò ala squadra y a sò alenadù Floriani. Al vëgn sperè te na buna colaboraziun cun l'alenadù ince ti proscimi agn.

Dal atra pêrt ti va ciamò n iade n gran y bel giulan a düc i sostenidûs dl'U.S. La Val, pici y gragn, che ne à mai lascè la squadra ladina sënza sò publich y a motivé i sogadûs vigni partida, sides pro chères davagnades y sides pro chères pordüdes. GIULAN!

I sogadûs jarà sëgn tla palsa estiva, le mët man dla preparaziun por la sajun nöia é preodüda ai pröms de agost.

Formaziun titolara: Lukas Eder, Egon Frenes, Paolo Vallazza, Alex Alton, Elmar Valentin, Stefan Sottara, Max Nagler, Alex Elzenbaumer, Romeo Rubatscher, Alexander Miribung y Emanuel Dorigo.

Alenadù: Floriani Claudio

Sostituziuns:

Marco Rossini gnü ite imped Egon Frenes (45^ menüt)

Freddy Sottara gnü ite imped Alexander Miribung (65^ menüt)

Insëra, mercui ai 23 de aurì él gnü sughé l'andata dla semifinala de Copa Provinzia cuntra la squadra da Ritten, che süga le campionat trê te 3 categoria mo te n ater girone. La squadra da La Val à incuntè na squadra sterscia, che à lascè udèi sües cualitês portan a ciasa la devènta por 2 a 0. Ai 7 de mà gnaral sughé le ritorno sön le ciamp dl Ritten.